

Tesalonaika 2

adi letama wairabuinama

Pol na waikaiwama

1 ¹Taugu Pol, Saelas be Timoti uma letanama ka girugirumina, taumi aitauga Mamaitua na damma Tesalonaika meagaina ko miamiana garomie.

Mamaitua Tamadama, be Bada Yesu Keriso taumi garogaronama.

²Mamaitua Tamadama, be Bada Yesu Keriso adi raukiviverema be adi subama garomie e kenana.

Etara Yesu na kaba verauma raḡanine

³Yau bana, tauma raḡan matabuna Mamaitua kawai kaiwena taumi aubaimima. Be inam nama ya verena, baninama ami waisumaḡama e moramoraba be ami wainuapaḡoma ami banagama garodie mate e moramorabana. ⁴Vutuna aubainama Mamaitua na damma dobu ḡesaudima garodie, tauma ka rarau guyaguyauemina. Baninama taumi garomie piripiri be nuaboya a moraba kauana, be yaḡoro taumi koya damiporedi be ami waisumaḡe yaḡoro ko kaikai guratena. ⁵Mamaitua na waiguyauma kana taiye, taumi nuaboya be piripiri ko banabanavidina. Be uma nuaboyedie be piripiridie tauda yodi tà kita da Mamaitua na etarama, inam vutuna didimana. Baninama inam kedane e vovo kaukauemina, na waiguyauma aubainama, da tokare na waiguyauma nopone ko saḡana. ⁶Mamaitua banaga adi kovoḡama tokare e utedina, vutuna aubainama aitauga taumi ta raraukivi gewegewemina, taudi tokare e kovoḡidina. ⁷Be Bada gunume e maḡatara be e yovoyovona raḡanine, taumi aitauga yodi piripiri be nuaboya ko banabanavidina, tokare suba be sipere Mamaitua e utemina. Be teneḡinama nama tauma e utemaina raḡanine, Bada e maḡatara be e yovona kai menamenanama maika, na aneama wairewapanidima mate. ⁸Be taudi aitauga Mamaitua nam ti kataie be dà Badama Yesu na giuma nam tima vovo teyetyena,

taudi tokare e kovoḡidina. ⁹Taudi Bada na rewapanama be na yanama ta dobi pore ḡavoe be kovoḡa kenakena nonoḡinama ta paḡona. ¹⁰Be tauwai sumaḡa babaudima matabudi inam raḡanine tai nuaverena, be isanama ta kaisuḡusuḡuna. Be taumi mate, baninama ama rauguguyama koya vaie be koyai sumaḡana.

¹¹Mamaitua ya vinemina da taumi tauna natunatunama. Vutuna aubainama ka moimoiragina da raḡan matabuna Mamaitua matane, taumi sibo na ḡoane nama koya mia kauana. Be mate ka moimoiragina da Mamaitua rewapanama e utemi da ami waisumaḡe aba veredima ko noḡonoḡotidina, vutudi sibo koya voivoiedina. ¹²Inam raḡanine taumie da banaga matabudi tokare Bada Yesu isanama ta kaisuḡusuḡu, be taumi ta viviremina nama Yesu ta vivirena. Inam kaidima Mamaitua be Bada Yesu Keriso adi raukiviverema aubainama nama ta tubutubuḡana.

Mamaitua tauwai ḡavienama^a

2 ¹Yau bana, Bada Yesu Keriso na verauma, be nema tauda mate t̄ai rawateḡei bakona, vutudi ya riuemina. ²Nam aitau e riuwai gusumi bo e tainuaboyemi be umanama e riu, “Bada na raḡanima kaiteka ya tavana.” Avedi da taudi rauboni kaikaiyovudie adi giurma kabe ti paḡopaḡo, bo tauma kabe leta k̄e girumi be umanama k̄e riuriuedi, “Bada na raḡanima kaiteka ya tavana.” Inam matabuna kaiyovu. ³Nam aitau ei buemi be koi sumaḡe.

Bada na raḡanima nam tokare e tava makai. Noḡone banaga toitoi adi waisumaḡama ta gosedi be Mamaitua ta mia tautauriena. Inam raḡanine Mamaitua tauwai ḡavienama e maḡatarana. Tauna vutuna gewagewa tauwai tubuḡidima. ⁴Tauname e kawa saḡe munaḡe, be Mamaitua be yaba matabudi banaga ta rarau duneedina e riutuatuagaiedina, be Mamaitua na tempolma nopone e saḡa da e mia, be tauname e riu munaḡe be e riuna, “Taugu vutuna Mamaitua.” ⁵Ko noḡoti da taugu taumi mate t̄e miamiana raḡanine, uma yabedima matabudi e riuwai nonoḡimina. ⁶Be Mamaitua tauwai ḡavienama yodi sibo ya verauna, be aba inam baneginama e kaididi be e raberabena, taumi koya kataiena.

⁷Mamaitua taumia tautaurienama na rewapanama kaiteka mareḡa waimoisirie e noyanoyana, be aitau da taukaididinama ya kaididi be e raberabena, naumeki da na raḡanima boruborune, e raukai gose be e variana. ⁸(v8a) Yodibe inam baneginama Mamaitua tauwai ḡavienama e maḡatarana. ⁹Mamaitua tauwai ḡavienama tauna tokare Seitan na rewapanae e maḡatara da Seitan na noyama e voidina. Be Seitan rewapanama e ute da inam baneginama voia be mataira dosidima e voidi

^a ‘Mamaitua tauwai ḡavienama’ Gurik bonane ya riuna: Tarawatu tautuaḡaienama. Uma baneginama tauna noḡone e naḡonaḡona, be tarawatu matabuna tauriutuatuagaaienama.

da banaga sibo ya kaiyovuedina. ¹⁰Be yaba toitoi e voiedi be banaga kwakokwakodima e boru waidegedina, baninama taudi Mamaitua na riukauama a tuaḡaie, be nam ti sumaḡena da yawasana sibo a banavi. ¹¹Inam kaudima aubainama Mamaitua banaga e voiedi da taudi kaiyovu tai sumaḡedi be tai muriwatanedina. ¹²Yodibe matabudi adi kovoḡama dosinama ta paḡona, baninama riukaua nam ti sumaḡena, be taudi gewagewa awai nuapaḡo guratena aubainama. (v8b) Be Bada Yesu na kaba verau munaḡama raḡanine, yavutune Mamaitua tauwai ḡavienama e suve waibakoko, be Yesu neneḡarine e kawa gewagewa be e kawa koakoana.

Ko midi da bagibaginaḡa

¹³Yau bana, Bada ewai nuapaḡoemina aubainama, tauma raḡan matabuna sibo Mamaitua kèi kaiwena, baninama tauna noḡone ya vine dokemina da na yawasanama ko paḡona. Uma yawasaninama koya paḡopaḡona maika, Arua ya voiemi da taumi banaga babaumima, be mate taumi Mamaitua na riukauama koyai sumaḡena. ¹⁴Inam baninama tauma ama rauguguyama aubainama, taumi ya vinemina da tokare Bada Yesu Keriso neneḡarine ko miana.

¹⁵Vutuna aubainama yau bana, ko midi da bagibaginaḡa, be aba mudumaie bo letae kawai katakataimina, vutudi ko kaidididina.

¹⁶Tauda dà Badama Yesu Keriso, be Tamadama Mamaitua isedima tauma ka kaisuḡusuḡuna, baninama taudi ai nuapaḡoeda be adi raunuatoie a duḡudana da tauda tokare marae tà mia nonoḡana. ¹⁷Be mate tauma ka moimoiragina da tauna yaḡoro e duḡumina, be rewapana e utemi da taumi ami giuma verediḡa be ami voiama verediḡa ko voiedina.

Pol moiragi yai baḡena

3 ¹Yau bana, yodi inam kawai baḡana da aubaimaima ko moiragi da Bada varinama sibo ya daberara makai be banaga sibo a vivirena, maika taumi ḡaromie. ²Be mate ko moiragi da banaga gewegewedima nimedie be sibo Mamaitua yai yawasanimaina. Baninama nam banaga tabutabunama i sumaḡana, be ³Mamaitua tauna vutuna patupatutunama, tauna tokare rewapana e utemina, be mate Mamaitua tokare tauraukivigewagewa na rewapanae be e midi ḡaḡarimina. ⁴Tauma Bada isane ka noḡonoḡotina da taumi aba ḡaromie kè riuriu vavasagemina nama ko voivoiedina, be yaḡoro da ko voiedina. ⁵Be ka moimoiragi da Bada nopomima sibo yai keda dokena Mamaitua na wainuapaḡoe, be Kerisoe sibo koya midi da bagibaginaḡa.

Nam ko matagayawa!

⁶Be yau bana, yodi Bada Yesu Keriso isane ka riuriu vavasagemina da raḡan matabuna tauwai sumaḡa matagayagayawidima ko voredina,

baninama taudi nam ama waikatakataima ruvane tima miamiana. ⁷Taumi ama voiamana koya kataiedina, vutuna aubainama taumi sibo koya ruvamai, be nama koya miana. Tauma taumi mate tē miamiana raḡanine, tauma nam ke matamatagayawana, ⁸ibewa, tauma kupi da suara kē noyanoya guratana be nam ami kanima ke kanikani yababena. Ibewa da tauma ama noyae kani kē paḡo be kē kanikanina, be nam aitau ke tainuaboyamna. ⁹Tauma ama didimanama e kenakenana da taumi sibo tauma koyai kani bagibagimaina. Be tauma nam nama ke voiana, baninama tauma kē ḡoḡoena da mataira verenama sibo kē voie be koya kitana. ¹⁰Be tauma taumi mate tē miamiana raḡanine, tauma umanama kē riu vavasagēmīna, deḡoda aitau nam ima noyanoyana, naumeki da tauna nam e kani.

¹¹Be tauma kē vaiena da banaga ḡesaudima ḡaromie matagayagayawidima ta miamiana. Taudi nam tima mia genuana, be tubuḡidima anisagunama noyanama tima voivoiena, ibewa da taudi tai vadasaḡa be tawai karakarakutu naḡona. Taudi inam tunidiḡa ta kwapukwapu yababena. ¹²Tauma Bada Yesu Keriso isane inam nama banegidima kawai baḡedi bo ka riuriu vavasagēdina da taudi sibo a mia genuanana, be mabidie a noya da sibo adi kanima a banavina. ¹³Be taumi yau banagama, raḡan matabuna sibo vere koya voivoiedina be nam tunimima ya tuaḡai.

¹⁴Deḡoda aitau riumaima uma letanama nopone nam ei muriwatane, naumeki da inam baneginama ko kita porena, be nam tauna mate koi rawateḡeimi. Inam kauine tauna tokare e tunimayaḡa be ¹⁵deḡoda tokare na noḡotama e vitarena. Be nam ko voie da ami ḡaviama e tubuḡa, ibewa da ko raukurena, baninama inam taumi turemima.

Waikaiwa damodima

¹⁶Yau bana, suba Badanama raḡan patapatanama suba sibo ya utemina, yaba matabuna ḡarone. Bada taumi ḡaromie e miana.

¹⁷Taugu Pol, uma waikaiwinama taugu nimaḡomigūe è girumina. Yodi taumi ko kataie da uma letanama riukaua taugu nimakiviguma. Uma inam taugu yau girumama.^b

¹⁸Dà Badama Yesu Keriso na raukiviverema ḡaromie e kenana.

^b 3.17 Leta tabutabunama Pol na taugirumama ya girumina. Be vers 17 da 18 taudiḡa inam Pol taunaḡa nimane ya girumidina.